



馬石田文集卷第六

制誥

遣奉使巡行詔

朕祇承洪業夙夕惟寅凡所以圖治者悉遵祖宗成憲
曩者屢詔中外百司宣布德澤蠲賦省刑賑恤貧乏思
與黎元共享有生之樂尚慮有司未體朕意庶政或闕
惠澤未洽承宣者失於撫治司憲者怠於糾察俾吾民
重困朕甚憫焉今遣奉使宣撫分行諸道案問官吏不
法詢民疾苦審理冤滯凡可以興利除害速宜舉行有
罪者四品以上停職申請五品以下者就便處決其有



政蹟尤異暨悔跡於丘園才堪輔治者具姓名聞咨尔
臣庶體於至懷

追封河南王夫人制

古者婦人之義名字不出閨門迺所以別男女嚴內外
也故河南行中書省左丞相卜鄰吉台妻胡氏徽柔惠
淑蚤嬪高門相其夫子顯聞于時子方推恩四海矧我
股肱之舊而有尔伉儷之良乎故追封尔為王夫人仍
啓河南故圻以從封夫爵噫婦官一品禴翟有光其尚
陰隲尔家朕我寵休之無替

思州軍民宣撫使田晃晃忽兒不花封贈二代制

國家外建藩屏以靖遠人責其宣布懷仁之惠能使恩
威並流而一方清謐者稽于國典可不賞勞乎具官某
父某官某向膺朝寵勤庸服官勦力小心不聞有過乃
教忠於嗣子得寵慶於世家茲朕所不忘者也故命追
褒異數階秩一品有靈在幽尚迪尔後

比屬有司考禮于卹典矣而婦人之貴嘗視其夫子焉
况有鵲巢汝墳之懿能行於其閨門衽席之間者乎具
官某母某氏女儀柔婉來嬪辨族相其宗事珩璜有節又
能薦生令子服柔疆場撫綏之勞湯沐衍封昨以列國
其尚歆承休寵利尔後昆以延饋祀之無已哉

朕以孝治天下凡人臣之親悉命回其班列之次功庸
之等以為寵數之異焉具官祖父其官其昔備官使輯
綏邊氓頗著惠懷有譽南服夫天之施仁於物無間朕
敢不法天而已哉宥密之司階品為貴啓爾後人保茲
終吉

先王制禮婦人之義飲食衣服祭祀而已非有與於外
事也然或婦道母德可以表率宗族而成其夫子者願
宜有以顯貴之也具官祖母某氏早躬組紉克遵女戒
作配令族柔閑有儀惟時聞孫扞我邊圉膺被爵祿光
寵于時而尔可不疏封鄉國以廣彤管之訓乎贊書在

門其告泉壤

太師右丞相封贈三代制

定策元臣肇啓中興之運推恩彝典聿申先正之褒揆
禮是宜勸善惟允具官某質實無競沉鷲有謀朕勞王
家久著屬橐之績薄違圻父夙專乘車障之功嘉尔
曾孫為予冢宰於戲漂陽開國儀宗斧鉞之光冊府書
勳銘載旂常之顯英靈如在寵數是歆

曾孫有慶衍三世之恩榮大賚匪私勸百辟之忠蓋有
嘉淑女作配先臣具官某妻某孝養姑嫜教遵姆傳居
謹珩璜之節躬親絲枲之勤宜厥家人相其宗事魚軒

翟第往膺江左之封鳳詔龍章用播名南之德歆予時
命迪爾後昆

開國承家禮重昨勲之典析圭儋爵恩先子善之仁報
施匪私褒崇惟稱具官某英標倣倘偉器沉深蚤奮厲
於師中爰馳驅於戎右股肱心膂桓桓挺萬夫之雄弓
矢干戈井井飭九伐之法世緝良將胄衍名孫定大策
於樞機奠皇圖於寰宇於戲石城鍾阜肇開赤壤之封
礪山帶河允著丹書之誓貴爾寔安歆我絲綸

朕茂膺景運大賚元勳恩推再世之封禮及重闡之慶
具官某妻某氏柔嘉維則婉孌有容事夫盡舉案之恭
職脩中饋弄孫致含飴之樂福裕後昆凡我邦國之光
縈尔室家之助鳳臺昨土業開脂澤之田鸞詔封泥永
貴泉扃之兆尚歆寵數益衍休祥

朕以崇德報功實先王之令典建邦啓土昭奕世之殊
勛騰我舊臣錫茲新命具官某魁竒天挺卓犖人雄韜
略邃於孫吳志勇邁乎賁育昔武皇撫軍於龍漠躬櫛
風沐雨之勞而大將出陣於魚麗懋掃穴犁庭之績威
行萬里恩浹六師訖振旅以裹戈底來賓而包匭每御
衣裳之會聿深鍾鼓之恩生子象賢由教忠而尚義為
國敵愾遂翊運以中興永惟闕閱之隆端繫社稷之重

不有異數曷稱至懷於戲朕矢彤弓嘗旌勤于征伐丹
書鉄契尚迪慶於承傳淮甸分茅泉臺告第
朕眷元臣之勛幼被慈母之訓屬有司之考禮宜大國
之疏封具官某妻某毓秀名門作配君子珩璜琚瑀脩
婉婉於婦容蒞藻蘋繁致齋在於宗事薦生令器實贊
丕謨底海宇之謐寧承邦家之休慶綠綈方底寫翔芝
檢之書霞帔襲衣雉纈茀車之采江都錫壤泉室增華

太保左丞相封贈三代制

匡時靖難資大策于元臣崇德報功覃湛恩於累葉奉
常議禮輿壤定封具官某故曾祖父朕勤侍衛秉信功

臣太傅銀青榮祿大夫上柱國梁國公謚敬簡探馬哈
兒秉質無華詒謀有永蚤備勾陳之列式昭析木之祥
衍善慶於曾孫薦忠貞於熙代使宅百揆光于前人於
戲開國浚郊具儀文於鉄鉞承家新鄭紹世美於衣冠
錄我絲綸告尔窀穸可追封陽翟王

朕論功定賞念扞衛之多難推慶行封俾覃迨於三世
懿彼靜女配予先臣具官某故曾祖母梁國夫人忽都
貞蚤飭壺儀克承宗事不假詩書圖史之戒素閑織紉
組紉之功迪美萃於曾孫發祥殷於令族新廟奕々斷
松栢於析津原田每每畫封圻於梁土龍章有赫象服

未歆可追封陽翟王夫人

朕獎元勛息推舊德濟其世美詔庶孫謀屬大業之中
興賴名藩之外援追封奕業寔著曩章具官某故祖父
守忠翊正效節宣力功臣太師金紫光祿大夫上柱國
梁國公謚莊順稱海質稟淳龐躬行愷悌橐鞬宿衛久
服勞於王家弓冶承傳遂開先於相闕方乾坤之清謚
俾綸綍之渙頒用禮勸忠書功旌善於戲伊洛瀍澗樂
哉魂魄之遊山川土田衍爾蒸嘗之奉昭茲未裔祐我
丕基可追封河南王

命婦朝后彤管著於女箴令妻相夫繫絲陳于內則曹
惟淑德嬪于名門具官某故祖母梁國夫人忽刺貞毓
質柔嘉修容婉婉久襲祥於世業當擢秀於孫枝為國
懷材贊予茂烈雲翔寫誥俾澤漏於泉臺颺轉魚軒想
坤遊於梁苑尚貽多祐福爾後人可追封河南王夫人
惟王建國必崇德以報功自天降康乃生賢而靖難茲
眷元臣之懿宜推先正之褒具官某故父懷忠濟美積
德崇慶功臣太師開府儀同三司上柱國特進河南王
謚忠懿謹只兪蘊善弗彰紹謀斯永為即執戟夙多宣
力之勤有子克家益勵教忠之訓定中興之大策立不
世之殊勳匪衍王封曷稱朕意於戲河山帶礪式箴盟

府之書乾坤珎符期萬熙朝之祐格思英爽歆此寵光
可追封鄭王

朕惟元臣克相中興之業母有令子宜膺崇秩之封稽
諸彝章廣我孝治具官某故母河南王夫人燕赤吉納
夙閑姆訓綽著婦儀薦蘋藻於蒸嘗節珎璜於夙夜內
政素勤於中饋慈訓尤切於斷機德啓閨門光資邦國
俾茲鄭圃桑翟第以來遊嘉彼召南賦鵲巢以行化俾
頒綸誥用賁泉扃可追封鄭王夫人

平章也速迭兒封贈三代制

夫用之紆者積必厚行之徐者力弗殆斯道之常匪曰

責報也平章也速迭兒曾祖父贈定威佐運功臣榮祿
大夫司徒柱國追封曹國公謚忠定撒撒出於華旋風
奮材武從我太祖皇帝親屬橐鞬崛起戎列威行方國
戰功良多及定隴陝斬將搴旗臨敵致死大節赫然傳
不云乎活千人者有後茲爾數世之遠傳家孫曾愈碩
大光顯又得議封于禮官博士非用兵有活人之德而
然乎命須異數開國曹南中土與壤襲慶濟美可示為
將者之勸可贈定威佐運功臣光祿大夫司徒上柱國
追封曹南王謚忠定

古禮命婦朝后是則婦官尚矣平章也速迭兒曾祖母

追封曹國夫人塔拜劬勞慈育生子克家戰勝攻取不
佐興運議禮制度于尔有封後夫之爵曹國小君象服
翟裼茲追寵可追封曹南王夫人

朕稽古為治立國以禮故臨御四海永慕祖宗創業之
艱難美其興運佐命之臣厚厥世賞以訓臣鄰矧其胤
裔又有能全其終始者乎平章也速迭兒祖父贈宣忠
靖遠功臣光祿大夫中書右丞相柱國追封曹國公謚
桓毅也柳干蚤備宿衛分從賢王前驅先登戡定河外
俾金國為墟而宋社遂以屋者盖尔戰多之力焉異姓
封王於尔為寵矣英爽不亡尚保尔世哉可追贈宣忠

靖遠佐運功臣金紫光祿大夫中書右丞相上柱國追
封曹南王謚桓毅

夫恩禮覃於百官則先近臣漏澤施於九原則觀來者
平章也速迭兒祖母追封曹國夫人臧列蚤嬪高門無
違宮事克相君子為王虎臣又有間孫贊予景運俾有
司議封乃追命尔為王夫人以曹南之田為脂澤之賦
尚歆寵渥益衍廟食可追贈曹南王夫人

先王有崇德報功之制豈曰觀美盖以旌善而勸忠也
平章也速迭兒父光祿大夫中書左丞相先贈協謀定
遠佐理功臣太師開府儀同三司上柱國曹國公謚武

宣阿刺罕生長富貴宴安而氣無統綺子弟之習勝衣
荷戈奮身前驅維時世廟觀兵江游貔虎百萬之衆謀
臣如雲乃能立功名于其間北征叛王轉戰千里南殄
奔君樹旗海嶼勛勞顯著寵賚便蕃我國家於君臣之
道可謂至矣朕不聞鼓鼙猶思將帥况尔有後為予蓋
臣中興之初率兩河將士戮力介冑之間大臣以聞乃
隆推恩之禮上及於尔三世焉曹南之郊桑谷沃壤開
國稱王人臣極位尔克有靈歆我綸命可贈推誠宣力
定遠佐運功臣太師開府儀同三司上柱國追封曹南
王謚忠宣

我國家經營南國之初尚賴膂力之士材武之臣克成
大業勛勞之蹟皆以銘於太常矣又且尊顯其身以至
於室家之有慶者茲非典禮之懿乎平章也速迭兒母
曹國夫人脫端淑慎端惠夙配君子遵名南之化而象
服是稱施孟母之教而訓忠有言卓茲令器為朕虎臣
臨御之際褒錫宜先開國曹南以衍貽澤之賦煒其榮
哉賁尔窀穸可追封曹南王夫人

君子不昵於宴安之私以能成其功名者亦嘗資於內
助焉平章也速迭兒母曹國夫人闊、倫幽閑端懿鷄
鳴而起相其宗事婦德有稱沒後夫爵啓封曹王魚軒

象服裕尔後昆可追封曹南王夫人

大傳禿魯封謚制

帝垣台位象已著於上玄大傳師臣官尤崇於常秩有懷舊德追錫真王大傳禿魯蚤陟華階懋脩素履小心翼人文昭持橐之班終日乾勞著屬秦之績宗親入覲儉相是資耐金不罰於諸侯英蕩悉同於元會樞機宥府奠軍國於乂寧鼎鼎台司贊陰陽於化育踐敷禁近閱應歲年持風紀於臺端肅官箴於朝著天不憖遺朕用盡傷思吞茂勳爰申卹典於戲昨尔茅土俾開國於廣陽播予絲綸尚流澤於函壤諒茲靈爽服此寵章

可贈懷忠秉義昭宣弼亮功臣太師開府儀同三司上柱國追封廣陽王謚清獻

男位正家恒有資於內助女師結悅庸作配於上公獎我舊勳追于佳儷太傳禿魯妻畏吾氏幽閑毓德婉奕賦姿象服是宜奉蘋蘩於祭祀彤管有煒謹珩璫於箴規懋著婦功克相宮事痛所天之先殞誨厥嗣以益嚴石窀啟封賜廣陽之大國容臺議禮贊名南之夫人享尔高年欽此異數可封廣陽王太夫人

右丞按灘封謚制

朕以崇德報功之制聖王建國之皇圖論名立謚之稱

昭代褒賢之鉅典用光綏寵俾洽巨隣右丞按灘少稟粹姿蚤登膺仕周廬星列入陳扈蹕之勞專駟颺馳來上屯田之奏息威襲蠻夷於冠帶忠孝擴詩禮於箕裘錫類著乎家邦浚明勤乎夙夜貂蟬七葉飾躬不瀆於華鮮孤矢四方迪德彌彰於懿美篤生令器丕佐明時聿彈嘉猷晉參大政橫經內殿矢茲密勿之言熙載外朝體朕都俞之意有司考禮於汝推恩爰頒渙蹕之辭式副哀榮之志於戲丞相一品英靈尚克以歆承泰階六符善慶益延於似續錄諸告第欽我贊書可贈秉義效忠著節佐治功臣太保開府儀同三司上柱國追封

特進趙國公中書左丞相謚貞孝

周南正始教化被于閨門趙國疏封寵榮光于泉壤爰稽彝典用獎有官右丞按灘妻唐吾氏毓質柔嘉脩儀婉婉來嬪閔閔蚤乘翟茀之車克相夫君益著鵲巢之德篤生令器褒作名臣服慈訓之不忘迪嘉謀之入告推恩追錫體人子報本之心考禮飾終示我朝廣孝之治尚昭懿範歆此告詞可封趙國夫人

尚書左丞相某封謚制

朕纂承天序入正大統思予皇考繼志述事眷惟至大之間更張庶政務適人宜褒贈以勸百官鼓鑄以利兆

姓時弗僉諧事或中輟興言追悼斯念舊臣故尚書省
丞相某早列環衛給事禁闈升諸台席浚明夙夜佐予
皇考一德一心顧遇寵賚廷臣莫及予方以孝治天下
躬裸武廟如見羹牆况予先臣有子在列茲命禮官公
議于廟謂爾宜封郢城王位貴專楚都旌旗斧鉞開國
西南精忠不昧尚從先皇於遐狩哉可贈竭忠宣力守
義佐治功臣太傅開府儀同三司柱國郢城王謚榮敏
表牋

賀元旦表

皇極建中賁嘉生於世運乾元資始衍嗣歲於人時叶
氣開先純陽肇德欽惟道全居正功洽體仁坐宣室以
受釐百神奉職御明堂而布政萬國咸寧勾陳環列于
端門庭實駢羅於文陛臣某等塵聯烏府迹造鸞行進
封事於銀臺慙稽袞補紀卜年於寶曆欣對嵩呼

正旦賀興聖宮表

帝曆開天祥發貞元之會母儀法地源疏河海之涵百
物順嘉四時叶序欽惟陰功庇世懿德承乾肇聖緒于
姜源弥虔祖武嗣徽音于太妣益衍孫謀茂綏獻歲之
祥膺保履端之吉臣某等遭逢世泰綴列朝行官備中
臺玉朔願敷于錫福慶隆長信民功仰荷於資成

賀正旦箋

夏正授時謹民功於肇始皇儲主器履帝武于開先慶
集三朝福覃萬姓恭惟秉文純粹叶德光華青煇一作
迎陽爰啟前星之重黃離繼照式昭太極之尊宅元祀
以承天布王春而獻歲臣某等叨塵官序忝列諫垣齒
胄雲庠茂對奎明于午御賡歌魯頌仰觀日麗于寅賓

賀建儲表

伏以天潢毓德聿開聖嗣之隆廟祐承祧爰啟儲闈之
慶祥臻泰道福集昌朝欽惟迪德堯仁躬親舜孝日麗
乎天而明兩益紹重華帝出乎震而洊雷弥嚴繼體乃
眷元良之懿式膺監撫之崇臣等倖位烏臺趨朝鷄曙
前星奏瑞載瞻青輅之旂太極含元第衍黃圖之籍

賀春宮箋

申觀儲祥肇泰始含章之慶春宮正位受少陽體德之
尊神器有歸宗祧是賴恭惟生知忠孝夙稟溫文躬問
侍之勤德已昭於帝胄膺監撫之重道允叶於皇猷承
華克紹於丕基建本方隆於大寶臣某等忝居侍從喜
際文明鶴禁景遲願早親於四學雲門樂奏期介祉於

三官

賀建儲表

聖嫡承桃大慶方延於國祚神孫主器鴻休實肇於天
源龜筮叶後臣鄰效順欽惟慈仁坤育靜德乾儀益恢
皇極之尊繩其祖武俾正少陽之位貽厥孫謀建儲允
屬於元良繼體式昭於岐嶽臣某等叨塵憲府欣遇熙
朝瞻鸞駕於春宮三靈奉翊陪鴻行於長信萬福時臻
監修國史賀正表

瑤圖撫運紹開致福之祥寶曆乘時肇序體元之始大
鈞播物淑氣迎和欽惟道洽古今性資文武潛心帝王
之學聖教日躋合德天地之仁皇猷允塞歲事啟戎於
農扈治功端本於王正臣某等辱備台司監綜史氏觴
稱萬歲樂快覩於龍光書載三墳期永垂於孤筆

監修國史賀正表

天明即命紹開帝曆之隆王朔躋元序正人時之始大
鈞塊北和氣冲融欽惟叶德重華備道全美御端門而
肆赦萬寓熙春坐宣室以受釐五辰順軌方九賓之在
列萃諸福以來臻臣某忝列師垣兼塵史觀獸尊奉勸
庸申效於嵩呼鴻筆記謨願同符於龜畫

賀建儲表

禮謹承祧首正元良之位德符主器丕昭大統之歸宗
社乂安臣隣慶抃中賀道侔乾始祥敷震亨受命建中

邦家之基鞏固詒謀思永著龜之吉叶從重暉煥於前
星鑱冊光于上嗣監撫有托似續無疆臣等獲覩青宮
幸趨絳闕聖神永錫頌壽考之萬年忠孝弥彰衍本支
之百世

賀建儲箋

德配前星肇正青宮之位禮嚴吉日丕昭寶冊之尊任
重承祧職動問寢中賀温恭風著英睿日新受震建中
式際上元之運明離繼照永開太平之基啟鶴禁以肅
清奉龜圖以祇敬國本斯立宗支以昌其等職厠震庠
班聯魏闕終始于學願廣緝熙之功追琢其章庸贊泰

和之治

賀立后建儲表

冊建中宮體黃裳之居正祧承長器仰蒼震之儲祥國
本以寧壺儀攸叙中叙聖資神武玄德欽明美教化厚
人倫允叶相成之義奉宗廟承祭祀丕昭繼照之明慶
洽三宮懽騰八表臣其職塵仙館筵帝廷運值上元
盛典並行於吉日天開大定顯謨已著於初年

青詞祝文

壽寧宮設醮青詞

伏以道妙無言神功不宰既仰成於乾造寔默相於皇

家祗即琳宮肅延羽服誦瓊文之累笈格絳景於叢霄
伏願有感必通俾昌而熾五風十雨爰祈玉燭之調億
載萬年益衍瑤圖之永

祭皇祝文

太歲迎神

白虎送神

病符喪門

於穆元造孕靈載物神御所棲曰歲斯福順成道祉備
我牲玉叶德坤儀受天百祿

神坤一作

輿載靈司彼金方宣義揚威以戒時康后儀象

坤靜德是將以籲以祈神其降祥

運化流行元氣大和轆轤上下或爽以瘥茲明誠儀

物孔多期底善寧如山如河

維靈在函輔茲歲君或侈陰威疴癘我人啟迪佳美惠

布善人鑒茲蠲潔以求報祠

明：在上不顯而臨牲幣孔碩聿將厥心神之格思有

肅其歆

我俎既馨我祝維修辰舍順軌神禩安游相我坤寧叶

于皇猷

馬石田文集卷第六

馬石田文集卷第七

章疏

請慎簡宮寮疏

伏觀延祐三年十二月十九日皇太子正位春宮百司
上箋稱賀禮畢欽惟列聖繼統治功大洽文恬武熙百
年于茲矣聖天子高覽古今軍國之幾登遠天下之本
日月之明無以比德皇太子殿下溫文仁孝天賦美資
急宜招延天下碩德雅望文采博通之士朝夕起居以
侍左右輔養懿美薰陶冲和三代紹述厥要惟茲傳云
成王始為太子也太公為師周公為傅召公為保伯禽

唐叔與遊目不閱深豔耳不聞優笑居不近庸邪及為君也血氣既定游習已成雖有放心不能奪已成之性今皇太子殿下春秋鼎盛神明日疆道德之言禮樂之事當豫諱而速親其方不過求賢而已伏乞今後議行建立宮寮之時公集大臣覈求名實相副端能調護羽翼儲闈之才以係四海之望所謂下官臣僕亦宜精擇而不可雜以高賈冗瑣之流天下休戚之源實在於此卑職草萊賤士誤被拔擢敢不盡言少紓重責

建白一十五事

竊惟古者建立言事之官非徒適於百官短長照刷諸司文案蓋亦拾遺補闕振舉絀維上有關於社稷下有係乎民人禮文風俗治體所存名爵謚贈政理斯在教化有方則善惡自別設施有法則緩急自明重穀則農自勤定制則官自守修武則先恤兵嚴試則可勸吏事欲究其本末言似涉於繁無統論難悉條析易陳所有建白事一十五件逐一開具如左合行具呈憲臺照詳伏請聞奏施行

一夫惟天子者上承天地下紹祖宗社稷是寄黎庶是戴宗高尊太無與比隆奉養當極其精美保愛當極其嚴密大而一飲一食小而一嘔一笑皆調攝聖體凝順

中和則清明在躬淑善咸應欽覩皇上仁心如堯儉德如禹伏願重以承天地祖宗之鴻業於進御之間當以玉食宜乎榮衛者為先至於酒醴固是穀麥所釀然更乞於進御之際命近侍臣隣思一獻百拜之義則天下生靈不勝幸甚

一郊祀者國之大禮在古所隆欽惟聖上仁慈孝敬度越百王伏願今後郊祀之日大駕親有事於南郊親裸於太室則天地答貺神明降禧薄海內外咸仰聖德太平之福群生幸甚

一大內正衙古之帝王朝百官之地今大明殿是也觀

闕盤鬱城雉繚環祖宗之所御黎庶之所瞻今聖上謙德弥恭尚居東宮之舊竊慮民物觀聽有所未喻伏願賜御大明正衙鎮服華夏統體天地何以言之譬日月星辰及順居次舍則萬物被光群生仰明也

一百官朝見奏事古有朝儀今國家有天下百年典章文物悉宜粲然光于前代况欽遇聖上文明之主如科舉取士吏負降等之類屢復古制惟朝儀之典不講而行使後世無所鑑觀則於國家太平禮樂之盛實為闕遺且夫群臣奏對之際御史執簡史官執筆縉紳班玉儼然左右則雖有懷姦利乞官賞者亦不敢公出諸口

如蒙聞奏命中書省會集文翰衙門官員究講參酌古今之宜或三日二日一常朝則治道昭明生民之福也一古之為治蓋有禮樂非徒事刑法之末也夫有道之世措置施設悉存禮樂之義欽惟聖上君德昭然孝慈純備嚮居潛邸招致天下儒學之臣延納海內知名之士禮樂文物洽乎聖性情作故踐位以來進儒術而抑吏道却珍禽而絕遊畋清心寡欲民物豐阜其用儒之效固已驗矣獨未聞今皇圖左右天下儒學之臣有幾海內知名之士有幾伏願憲臺聞奏乞賜依准治古之法命朝臣集議典制請行皇太子視學齒胄之禮明示天下教化之本雖道德之躬仁孝溫文固已篤至然聞見習熟又在薰陶此實係國家萬世之福卑職先上章疏特請選擇師傅左右之人至今未蒙施行然區區之情實念及此不勝切至之甚

一中書省樞密院御史臺三府掾史雖職掌文書亦日佐大臣決理政務伏請間奏設立律學筭學博士命隨朝二品三品正流衙門吏人欲求轉補三府掾史者就其所業於律學筭學博士之前應試依科舉差監察御史監試吏禮部官知舉每一周歲試舉一次則三府有得人之實下無躁進營求之私試中之人不必限以出

身之高下不中者發下本後考滿不得過從七品仍預
照會施行則立賢無方之道不偏

一諸道宣慰司除吐蕃南詔兩廣福建外如淮東浙東
荆南山東四道並為無用徒月費俸廩坐養官吏而已
如依准前代之制就令一道重鎮路分總管達魯花赤
帶受本道宣慰使等職名鈐轉數路上不煩朝廷虛設
職官人吏下不使數路官府牽制煩複無益於事

一諸翼軍官自萬戶下至百戶子弟承襲父兄之職者
合參酌古今之宜設立武舉並須習學兵法武藝如蒙
古色目人只試以武藝如願試兵法中者陞階漢人無

試兵法武藝中式者方許承襲如布衣之士願試及中
者亦各翼或不叙或戶絕等歇空相因名關內擢用如
此庶使武備不弛軍政稍嚴保大定功之事為體不輕
必若今日難於更張則四方宣力老将既已病死承襲
驕脆子弟但知酒色裘馬為華好一旦真欲冒矢石執
干戈以犯勅敵不惟本人自取肝腦塗地從軍將吏死
復何辜卑職歷觀前古之迹其禍患弊病未有不生于
太平之世竊慮及此伏乞施行

一司徒司宰皆古三公之流人臣名爵無與此位比者聖上
踐祚之初沙汰冗濫尤慎此官近歲屢有雜人等如沈宗攝

汪元昌輩亦受司空司徒切憲天下後世傳為口實非便

一親民之官守令為急然守令者緣係朝廷遷除之人
才或不良心亦知懼而行省所差府州司縣提控案牘
都吏目典史之徒往往恃其名後之細微縱其姦獨
舞文弄法操制官長傾詐庶民蓋此徒出自貼書小吏
數十年間轉充是役卑職頃居田畝嘗聞此等言曰我
等身無品級子無蔭叙原此初心謂之無賴而令竊弄
府州司縣之權利刻單弱以肥其孥良可憫歎如蒙聞
奏命中書省除各路存留流官經歷知事照磨外其餘
革去請參酌古制令各州判官僉書州事各縣主簿勾
稽本縣文簿實為官制不紊體統稍均人既有名事自
不苟為係於民不細伏乞施行

一命將守邊國之司命然御將之方當盡其道毫銖一
失利害懸絕要先知其艱難勞苦之情平居使之順其
逸樂畧其深文密法而不責其小廉曲謹然後効死也
易是為御將之道夫將不可不擇也擇而用之勿疑不
疑則專則重則可倚之而不効則名而殺之無
輕名之理今近歲連名北邊大將似涉輕易古語云臨
敵易將非策也竊慮及此伏乞聞奏施行
一漢軍征戍嶺海之南歲病而死者十率七八其所屬

軍官利在危殆之際必用資財擬指軍人北方本家所有孳畜田產厚息借貸准折還納終致破產不敢有詞夫以世襲軍官蚕食部下行伍深可哀痛今後如蒙將在嶺海及漳汀等數處徵戍軍人果有病患除官為看醫外其貧苦闕用之人比及取發封裝以來宜令本處有司約量借放封裝到日撥除還官並不收息或應借貸而不借貸不應借貸而借貸者從本道廉訪司體察究治如此庶不致中原軍戶日蹙軍官日富

一侍衛親軍根本所係宜令各衛指揮使立時教閱練習武藝膂力訓養精銳則萬一倉卒得用仍除鎮衛守把外一令與官負作工蓋造役使勞苦幸甚

一太常定謚古今義制欵使姦人知懼於死後善人有勸於生前近歲謚號之稱不公殊甚如今後太常定謚不公宜令監察御史糾彈庶使輿情稍伸國典不曠

一農穀天下之本也四民則以農為次百貨則以穀為首操帛布之重輕關生民之休戚者穀為急焉而近年工商深侈游手衆多驅墮畝之業就市井之末蓋為政者失勸農之道焉今後乞將各路府州縣達魯花赤專管諸軍奧魯提管知府知州縣尹專勸農事既歸一功仍可就更講究重穀勸農之方畫一開坐行下有司

石田先生文集卷七
七
遵守如民有馬牛騾畜遞相食踐田苗并此彼爭告田
土疆界不實等罪名及民間婚姻債負拖欠金銀資財
許得以穀贖罪准折輕賚之類果有力田之人縣州勸
農官等就於見在錢糧內撥賞束帛豚酒然後開申不
實者許廉訪司體察如此旌異慰勞行之數年必有成效
請量移流罪

禮樂刑政治國之具有一不修則施法度欽惟國朝有
天下以來不嗜殺人仁覆生齒涵濡煦育洽然大和而
於用刑尤切慎重然伏見近年頒降德音中間屢無量
移流徙之文竊慮聖人愛物之仁推恩未悉有傷至化

夫大辟死罪或被赦原釋然歸保妻子而減死流罪竟
無寬宥不得生還里閭此豈法之平先哉乞今後如有
例合長流罪惡別請定擬長流條例其不應長流者亦
請驗情輕重度地善惡每遇恩澤輒行量移如蒙檢舉
典故施行則天下生靈幸甚

辨王左丞等

竊聞傳云王臣寒之匪躬之故國家實賴焉夫便佞辨
給徒利一已視國與民漠然如無情者國家何補哉伏
見中書左丞王伯弘前中書平章政事拜住曩在政府
常以直言正色力持公平與權臣帖木迭兒抗論可否

若此二人其於國家緩急之際剛毅不屈信可倚仗宜
從憲臺聞奏將二人擢實機要不令外補實社稷之計

彈大都路總管范完澤

伏惟京尹之職民實具瞻漢唐以來尤慎茲選至如我
朝掄才審官嘗難其人不以輕授初如嚴游張郭近如
姚異二王等俱負才幹悉有名稱緣飾文雅練達事務
中外厭服士論羨之苟非其人曷以尸職今某非儒非
吏素無寸長才名不著於當時祿位苟同於先輩復若
近日私家被盜一事自至所屬兵馬司公廨迫勒訊問
賊徒侵官失體廢法任情即此而觀他可槩見理宜奏

代別選才能相應

彈中書叅議李羅等官

近為太師右丞相帖木迭兒濫用人員窒塞常選已嘗
論列今察知中書叅議李羅劉吉等四人俱係貼木迭
兒腹心之人依憑請託假借權勢李羅乃前尚書省得
罪之人劉吉乃宣政院起身之冗吏左司都事馮翼霄
在宣政院僥倖驟進右司都事劉允忠乃胥吏微品朦
朧奏准起復喪次以圖躐進如此四人列居頭要資畫
政事豈惟玷辱名爵實廢清議宜從憲臺奏罷

論執弓矢禁例

近承奉燕會該欽奉奏准禁約漢人百人以上執弓箭打圍處重刑百人以下流遠方徼及一兔之獲罪各有差竊謂作法有名乘訓無弊且今日見行條例已有禁漢人弓箭之科又有禁諸人聚衆之制若復以上項打圍處重刑等例錯綜而經羅之誠恐愚氓舉足陷罪難避易犯實為可憐而朝廷受禁人捕獸兔之名尤為非義宜從合干部分檢舉禁築圍地舊規遵守施行不勝幸甚

論秦州成紀縣等處山移事

伏見議遣大臣馳駟陝西賑恤災異祈謝岳鎮卑職叨

冒言路敢有愚昧謹用敷請夫山移大變實維天譴是為不動之物而動大臣以下各宜避官位推讓賢能畏懼修省表奏待罪庶乎對越上帝而為國綿延丕基非但遣使祈謝賑恤一方之隅而可弭災也竊又聞之應天以實不以文昔師曠對晉平公石言之語載在方冊世世為監今山移之譴理無虛報豈非在野有當用不用之賢在官有當言不言之佞所以感召不動之物而動毒延庶民甚可哀痛且端本首善在乎幾微萬物咸遂百職共宜然後高下奠位山川宅寧伏乞憲臺早為敷奏任用賢才相應

論百官請賞

比見隨朝見任請奉官負不思廉慎奉揚延職或求婦
嫁女或市宅營私徃來交為懇奏財物私相賣恩實蠹
公帑夫寵賞賜賚下及百庶國之所以鼓舞激厲天下
之具而為人臣者蒙受恩澤之時又當戒盈畏溢固讓
力辭必不允請然後敢受豈容敢瀆褻天聰乞請才物
者哉况見任官負自有俸給祿廩之厚品職封蔭之榮
至如一錢一粟擬合為官惜費而乃上虛府庫自肥其
家其於忠孝廉恥胥失之矣今後如蒙憲臺明白聞奏
禁約見任請俸官負不得交相懇奏財物仍令監察御
史糾彈庶幾賞及有功貧人知懼卑職愚誠不避謗怨
惟圖報稱少裨治明

論加恩典

故大中大夫浙東宣慰使陳祐執德不回夷險一致始
由才選擢任專城敷厯清資榮居方面當其蹈節而遇
害豈知徇祿以偷生况忠讜之言素著于時而患難之
際益明其志可謂不辱其身者矣稽諸卹典爰有加封
施及舊臣庶乎無媿切聞禮及賢臣國無不治之政息
推著舊士有先死之心故蔡國公張柔拔起編伍歸身
我朝擐甲荷戈開拓土宇卒為名將有稱于時偉績碩

功載在史冊如比史忠武公例進封為王可為無慚前
翰林學士承旨劉敏中文采振發學博行美精力未衰
歛身求退高蹈之節近世所無理宜半俸養老于家激
厲廉恥有開治化

舉翰林侍制袁楠等

上件官學問究極乎群經文章繁著乎當世修國史則
足以宣揚聖業代王言則足以潤色皇猷久次翰林屬
官誠為淹抑翰林修撰陳觀性稟端方操履嚴慎使之
居糾察之地必能振舉職業不苟於事前國子司業吳
澄知經一作博古學術博深求之海內可謂名儒如蒙擢置

兩院以備訪問相應

彈右丞相帖木迭兒

伏見中書右丞相帖木迭兒貪縱不正擅弄威福國之
姦邪民之蠹蠹已嘗上章論列今復體察到不公不法
等事一十一件云云當時不曾存稿如蒙憲臺早為聞奏追問則
天下生靈不勝幸甚

進千秋記略劄子二

伏以賓贊之官專以輔導為職輔導之方又以毓德為
急古先聖王嘉言善行日陳於前所以薰陶漸染養成
至性者實在乎此卑職忝居是任惟懼弗稱今纂集先

代儲貳政實及為臣子之道逐一繕寫成書名曰千秋
記略謹用黃綾裝背隨咨前去早為擇日一同進呈乞
依准經筵例進講施行
當職近纂集到千秋記略一書用黃綾裝背已嘗隨咨
發去貴院乞擇日進講去訖至今四月未蒙施行又照
得詹事賓贊等官俱以輔道為職理宜叶恭調護事大
體重責望非輕除外更乞早為擇日進講施行須至咨
呈者

馬石田文集卷第七

馬石田文集卷第八

銘

致樂堂銘

有母鞠我幸非而弁于何申之翼其燕其燕其寧遠
豆載馨于何將之承其氣聲嗟婦子克相肖匪惟
母宮泥布欄廟惟夫人受祀惟孝子錫類惟天可忱遲
斯百厥世

梁彥中家塾中致慈亭銘

肅祖禰於昭厥靈曰既降于墻于羨不顯孝思鑑
我蠲饒昌尔孫子賓興于世

書櫝銘

農善鋤耨匠利斧斤其器既精其績惟勤以食以居可
必於憎士不農匠崇文著書濟世間燕明世所須秘冊
於櫝經史百家內沐其澤外芬其華漆梓勒銘以告弟
子我承庭訓敢不殫爾惟天精明不啻于人惟物淫昏
乃迷厥貞匪聖匪賢曷先我覺匪訓匪辭我孰從學曰
我祖考矣葉顯揚華我世俗維文是將迨茲百年士而
不民我辭諄庶大爾身

書几銘

木也材漆也堅工之良其成器也完吾克有之利於燕

間之觀

居室銘

苟居室也敬則疇之可訂苟學古也專則疇之不傳有
幽者神有窮一作穹者天將寵綏之爾益勉旃

止善堂銘

維昔遠古取民顛蒙弗歧于福弗鄰于凶鳥居獸食其
行充一繫文字肇啓相我民止明靈宣昭曰人曰己以
破其昏以迪其內衷以燭于盲以震于聵洽于大同止
善之功

遵誨堂銘

其誨導，其遵訢，以績以勅，以資以殷。

王仁輔左丞德符堂銘

耕之澤，獲之程，植之芸，木之菁，是謂德符維善之趨，有以考室矢銘以質之。

輟然亭銘

維茲世人，時化物遷，雜沓紛至，攻于吾前，吾乃應之，而一輟然，其輟者何？不吳不教，不震不譁，順受維嘉，豈喜笑之者耶？

李氏種德堂銘

錢鑄具農服，田財貨集，商懋遷，維士進德，維賢種之。

于世，有年農高，外求我乃天，臯陶之道，子勉旃。

龔友輔續古齋銘

古有道，載諸辭，我續之，徵於斯，維友輔，篤古學，予為銘，聽毋藐。

允懷齋銘

疇沃，天是資，稼以獲，力之施，道豈遠，惟茲思，佩我銘，世乃師。

歲

舟歲

伐木于山，既斧既鑕，于綴以頡，金于屋，以編管，杵堊縷。

系研桐之脂塗于木間以禦外波不觚而剝不趾而趨
南國利之以載以居不車不廬越紀弥章矢溺溷濁汗
海若之宮馮夷乘顛軒輕上下萬維千纏不施其功卒
不思護圖田是言之水豈不仁哉

酒箴

瓶曰何鴟夷脂韋敢侮予為清冽以實我纏微以緼我
手我肩我燥鳩須我不我世須世將焚如彼殄天物而
糜民食莫而之急世迷厥明不而之辟日甘其喙而毒
其腸俾其鳩傷俾其叫狂古宗廟之事錫嘏受祀以洽
神人淫淫之以詎出入兩宮經營公家以脂以膏不予

之塗泥而陷其近利而安其後譏何鴟夷之智為

贊

恭贊御書奎章閣記

至順二年十一月七日上遣內侍至臣祖常門賜臣祖
常御書奎章閣記碑本一幅者臣祖常冗鎖下品才識
淺薄叨被光榮待罪風紀夙夜恐懼無涓埃補報於聰
明之萬一不得斥逐則為大幸顧廼曲加天寵猥賜定
翰煥乎日月之光華郁乎雲漢之昭回義畫八卦禹叙
九疇雖有義有文亦不是過也何則義有義而無文禹
有文而無義必待周文箕子者出然後文義大備垂之

無窮今皇帝陛下即位之明年開奎章閣布政四方大臣公卿以次進對少間則覽古文圖書綜覈古今求其治亂之原以施於天下以戒於群成廼製奎章閣記俾工官錄諸樂石茲皆萬世無疆之憲也猗歟盛哉臣祖常受賜不勝感戴聖德北向百拜齋沐謹為四言詩以贊於後云

皇帝明聖受天之命撫御四海民物遂性物性既遂太和雍熙雨暘咸宜于施清燕暇逸不遊不田刻文垂訓萬世是傳賤臣荷寵天光臨門竇藏私家以遺子孫臣拜稽首維聖作憲義畫禹疇法天行健有義有文於昭日星豈惟修辭大同於經嗟臣蝼蟻待罪風紀癯官追罰幸不訶鄙乃重受錫天德何報糜軀銜忠罔極覆燾

吳宗師書贊

有髦之思而弗施有肅之容而自儀冠裳孔都登降拜移載以德輿豐其道樞俾同我尚世之儒相實民之望豈囿於象者邪

贊雙兔

兔爰相伏蹲囿田墜宅丘原嗒彼冒儲頽功壽斯文圖尔形

贊吳牛

予觀牛之顛趾飲嚙同於羔羊其為功也不類遠矣今目擊此卷不覺興嗟

雜文

丁君誄

至順元年六月二十三日山北道廉訪丁君文苑卒嗚呼文苑學足以利人而不得大施而又壽不享年茲緇紳大夫所為痛也乃作誄曰

有樹其柏孰培而斧有良其器孰陶而窳昔也聯裳荷天之光靡行匪短靡言匪章試官民庸搏其頑亮以煦其疲瘠持斧冠豸而蛇虺弗囓何辜于天而不遐年誰謂為之終其周全服食之就耶藥石之不耶惟減受祔果何修也飛羽天酒君柩之旗崇璞山礪君墓之碑酌奠余奠誌莫余辭爰封茲誄敢識余悲

仁本堂解

粵古先民孕善於中而契乎天性侗不鑿質良而全潔然以名而不之貴靡然以利而弗之嗜懂往來不求不忤聖哲弥綸弼以仁義鯁囊在下瞽頑弗慈乃以孝烝之痺君弗弟而友道日至孝弟辨矣仁義治矣魯東家素王有子其徒揭示仁本範世立謨彼婦姑勃磳評

語帚箕而獨何君煦濡以愛飲食弗敬是又孝耶生先
乎吾宗法是系敢不悌耶儒服者云行仁之本孝弟實
始將由茲以達夫博施故又曰堯舜之道孝弟而已矣
翕和雍熙陶_上怡_下比屋可封而刑措不用者頌不由
世咸孝悌而仁哉我鮮仁本以斯義準吳氏之子尚佩
惟允

記河外事

有計吏河外來稱河外斗菽三十千弱民持錢告糶大
家大家亦無有菽日益貴民日益病而有司賦之日益
急也余方食菽箸記其說且曰菽之比粟也奚急而病

若是履賤踊貴也有司賦之亟其謂何請子悉之吏
曰子儒服者所謂治天下之事子蓋惰也故事國馬
食歲徵諸內地而不給則漕河間鹽錯置郡邑筭民之
口而廩食之估當其直而以藁秸入之官又不給則差
河北郡縣凡民穀幾可秣馬幾俾馬就食于外今中山
河間趙地百姓無糖粃菽旦夕命人挈男女之里中不
得易斗米其均賦於河外有以也子泥於古而昧於今
而不知通變之道子不仕則已子而仕將見瘵官之罰
集子之躬矣余言盡不可信耶

夏乾禱雨文

惟神靈馭雲氣呼吸雷雨變化固測出入八極今本鄉神之祠宇在焉是神之所依歸也而祖常等耕鑿給食事神弗謹神其降咎以病吾人歟且沛澤不時稻苗將稿歲或不登則何以供王賦而為神之樂盛乎神其鑒此也

策

會試策問

聖王之設官也俾在位之臣咸稱厥職以亮天工者其法不越乎選舉而已皇元稽古立制用賢使能敘進差等成法具在夫事以將弊亦可變通者乎入官者日滋

月積循名責實有不勝其煩然選舉乖方則瘵官病民曷術得以無二者之失乎命風紀擇可為守令者善矣然必求於資歷相當足以盡撫字之才乎漢世公卿二千石皆得辟舉可施於今乎課績良法也今以五事備責守令往者虛文考功可復乎州郡牧守限於品秩缺員者衆唐以來權行守誠激厲獎借之道獨不宜於今乎諸君子裒為舉首各悉其說

擬廷試進士策問二首

文武之道有國家者不可偏廢也文藝對策取學問之士我朝已行之矣獨武舉未講非所以備文武之道也

方今四海億兆之衆蘊蓄才能者豈無其人乎夫武職子弟襲受世賞衣食為事游媚富貴使之將萬人率千夫其餘一作功勳之裔則至厚矣國家何賴焉茲將議立武舉以求卓澤弓馬膂力之夫謀畧技能之士以應武選其策何先乎必功勳世臣之裔卓澤有能之人兼用並置仍不戾於時宜何者為使益之道乎子大夫學通今古之制衰然來廷其悉以對朕將親覽焉

朕纂承大業祇適先猷畏天愛人宮殿不敬故屢詔有司各揚迪職使息澤下流而吾民得以遂生而樂業斯朕之志也而聞有司療官者不一或貪墨不法以抵冒

條禁或優游不事以苟年勞或保祿自營或矯情取譽廉恥之風幾於不興且有官之士在民之上所以師表百姓而百姓賴以安者也而乃自治不嚴如何以居人之土哉又古者刑不上大夫而官序有常庶績咸熙而今也風紀之司糾劾論治偷墮回循之俗日盛未見其振起者何歟豈公家審官之術未得其要歟抑毀譽交養不覈實歟將求激厲廉恥之道而期官士自治王澤下流而百姓安其策何自子大夫明古今之義其於事宜之體講之詳矣悉心以對毋隱

題跋

書程大素彈琴詩序後

古堂上樂皆亡獨琴在今之琴雖盡非古意然猶愈於
亡也省菴周先生謂余言汴士程大素雅善鼓琴群髦
方聲其工被謔詩間予盍賦之予悼道不傳續綴事方
殷不能為韻語俾大素絃之省菴周先生其無庸病哉
致夫子擊磬圖

天地日月不容繪畫而松雪翁寓意於翰墨之中吾固
知其欠荷善之非真知聖者也

恭題御書雪月二字

上日御奎章閣聽天下之政蓋所謂未明求衣日肝忘

食者也恭己南面不廷聲色清燕之頃留神翰墨於昭
回雲漢之章尤見天縱之聖也茲雪月二字詔賜中奉
大夫侍御史臣健篤班事天子官侍御史持平緹紀憲
法是賴非有清明之德配彼雪月者則天子不以此官
官之矣聖人在上量包天地么麼小臣智識狹陋曷足
以窺之意者或萬一歟臣祖常又得陪侍御史下列乃
屬臣為贊遂告之以是俾其子孫寶承之以世其家焉
記御史臺題名後

天曆初有制命御史臺具石題名聖言渾灝有訓有戒
天聰洞達照知物情而文字簡易益堯舜都兪之音也

天地之大日月之明向德以象之臣趙世延既承詔為
文至順三年九月日臺臣等謹敷宣德意列載如上維
時長貳曹屬之次乃列於下後之未者尚徵於始而繼
之也且人之善惡咸在是亦懲勸之義而不可廢也嗚
呼慎之哉

題松廳事藁畧後

昔祖常承乏察院初官未熟時事往以篤信古道動輒
得咎言秦州山移之變則得奉祠大社諭鉄公丞相廢
法擅權則謫官開平嬰虎口之毒擯斥五年幸遭逢天
日清明更張化該凡是同惡姦狀顯露善類彙進眾賢

登朝而祖常忝備名用待罪詞垣暇日偶繙閱書麓見
有章疏舊稿數十紙曰繕寫成一編祖常詎敢賣直要
譽庶亦存愛君憂時之萬一云耳名之曰松廳事稿畧
者明其與同官論列者皆不記也至治三年端陽日浚
儀馬祖常識

題簡母墓銘

金石之文銘壙尤難宋王安石最善銘下疑有脫誤可知其
難也此簡氏銘郭貫所撰貫以篆名文亦簡不煩序人
子之孝天之至情難哉

跋姚照磨攷墓銘後

御史臺屬姚紱持其先世墓銘求予跋文予讀再過乃
識予後始予考京邑鄉貢第二場課包茅賦一篇紱實
寇數百人又以才譎佐予禮部今又據臺府祖常遺官
侍御史而紱陞克臺掌故則於其家世之傳文字之列
宜知也且彭澤活人之衆如此紱之碩大顯達寧有既邪

跋誠求堂詩

得龍之嗜龍可以豢知馬之畏馬可以舞彼含氣之不
靈而我得其情寔用乎誠况靈於彼者可不以茲求邪

記

固始縣重建縣治記

皇帝踐祚詔內外大小臣毋曠厥官縣大夫同稽首曰
予一二小臣才學不力罔有聞知奉天子明命辱守茲
土夙夜寅畏如齋如疾恐不能上宣王風下成民功以
遺邦之羞願茲公署既痺且陋不克以居何以館王人
何以聽臣事予一二人毋循故常毋爽等殺不刻不畫
再營再捐寧不偉歟越明年改元落成凡為屋大小若
千間為工始末若干日秋八月縣大夫走吏于光請記
厥績將勅諸珉以耀後之人祖常曰作器必銘作事必
記予以考古予以垂訓俾繼我者從事有稽也今賢大
夫承流宣化之余力不謀其私不肥其孳闢茲新堂照

臨百里可無隣也哉惟固始為縣或國于周或侯于漢
暨三國晉隋唐名制隸屬山川職貢有圖經在皆不書
記其迹於世者昔趙氏失德江淮之交風燐宵明戎鬼
畫悲乃若斯邑南窮山北盡淮陸可騎水可航田畝之
毗彌磔者無慮十八九虎豹之所宮狐狸之所號故老
遺人談之者尚感額而可行可疑掩袂也迨我朝天昌景
運奄有二國建制縣邑立官立師撫摩瘡痍寵綏俘遺
不四十年陳蔡曹宋吳楚甌越之民雜耕於野交居於
邠于今稱沃壤然其人失鄉遂教習夷獠之俗動以利
害相磨戛以舌吻相撼搖持短長日叢于官重不幸饒

茗漆竹箭材木之利杭秫之精鑿鳥獸之毛革所以塞
聰障明者靡不悉焉居官之位者難矣哉某年某月日
某官等偕治是邑人宜之不敷不詳如子安父居無
何奔走群執事作茲後輩之堂翼之之廡賓客有位
庖厨有次豐而不奢華而不忒譬天造地設人未告勞
又何變難為易如斯也非大夫之賢疇克爾哉蓋嘗讀
春秋魯莊公二十三年秋書丹桓宮楹明年春書刻桓
宮楹禮曰諸侯黜堊又曰諸侯之楹斲之斲之於春秋
於禮立教者三致意焉何則重禮制之或爽也今邑人
宜大夫大夫有人民有社稷文有吏武有兵諧其神人

罔有圯傾尚何以二魯謙諉為哉

小石山記

岳鎮之列居四方其間出雲氣神物變化靈異以之順成年谷滋益品類者大矣至於巖壑之美岩穴之秀木榮泉清玲禽竒獸之所託依往來仙真高人之所棲宿是皆有以寓游觀樂放逸在君子之所不可廢者也淮以南諸山石礦而不瑩予得小如盎者一鑿器實水植之其中亦磊落峻拔含蓄雄偉可喜也彼雖不能如岳鎮之大出雲氣光景神物變化要受封祭然世或欲捷淇竹以塞河決鍊五色以補天漏則予斯石也其能無

尺寸之功歟

留侯廟記

國家著令凡先民之有功有德於世者所在得祀焉彭城之留城有廟曰留侯之廟壞而不治神將無依其守趙君克明節制日之稍入勸民合力會財以集工徒蓋茨完好垣墉旁周階庭室屋有翼有承丹漆黝聖弗靡于淫經用量制咸稱厥宜神棲孔良象設惟肅吉蠲從事牲醴碩鮮鄉之人祝禱即享歲無疢癘嘉生繁興民庶翕悅遂來求文刻石廟中圖以侈大神惠茂封邑於無極也嗚呼古者作事有記為教之意深矣大矣彼有

務勸民以事鬼徼福以媚神者搢紳文儒之士固不欲
書於冊而告於衆矣茲能以禮祠其鄉之賢士大夫講
俎豆之容者則是敬君之命而納民於道也則是非文
法奔走之吏所能識也又可不載諸言辭以傳於世列
其懿行美蹟宣著顯揚俾人有所徵而為善焉可乎否
耶矧若侯之功德卓偉郡國固宜通祀之以矣余典禮
之官也故為志以表之

小圃記

余環堵中治方一畝地橫縱為畦畦者二十一塍崑崙
奴頗善汲晝日緇水十餘石井新浚土厚泉美灌注四

通陽春土脈亦墳起古所謂滋液滲漉何生不育者信
矣哉雜薑蕪蕪蔓菁芸薹諸種布分其間柵以楷薪限狗
馬越入蹂躪圃在前時為故主馬廐土有糞合水之膏
澤併漬之後兼熟芼羹以侑廩米之饋餉吾於世資蓋
寡取也如是足日計矣學子汪瑄曰鑄鉄作齒綴于橫
木使土平細尤宜菜余謂不然土之力完則殖繁若力
盡則亦不殖矣曰為小圃記

上都翰林分院記

天子歲省方留都丞相侍省中率百官咸以事從或分
曹釐務辨位考工或陪扈出入起居供張設具或執橐

韃備宿衛或視符璽金帛尚衣諸御物惟謹其為小心
寅畏逶走奉命固敢少怠而必至給沐更上之日廼得
一休也惟詞臣獨無它為從容載筆給輶傳道路續食
持書數囊吏空牘旬日不一署文書夙夜雖欲求細勞
微勤以自効而亦無有然後知上之人不欲後其心使
之研精於思慮而專以文字為職業非如衆有司務以
集事為賢者也至治三年浚陽曹公子貞分直學士院
實應後行祖常攝官待制聯屬以階上日懇謏薄無以
稱其官幸遭逢國家治康內外清謐臣隣庶恥不煩訓
誨蠻夷懷柔不待約束所以敷宣播告之辭猶慎且簡
間為民為歲而祠其詞之祝亦不誣神而夸故其意質
而文又寡是以益積其蘊蓄而不得肆發而為歌詩以
形容國家太平之功乃更相與樂其秩之美而憲其被
光寵於明世也吾徒之朕是選者良亦榮矣夫良亦貴
矣夫可不研精於思慮以俟上之名必蹈渾噩之實而
列陳之則庶乎不疾於躬也不疾於躬則於古也近矣
志諸孽因以存故實云

聖清廟記

大元建國全燕以御華夏永平為甸服股肱之郡至元
十有八年世祖皇帝甫平江南五歲矣即罷干戈放馬

牛而不用大召名儒修禮樂之事物有司咸秩無文于
是永平郡臣以其邦為孤竹舊壤伯夷叔齊兄弟讓國
之所逃者也列文以請大臣以聞上曰其命代言為書
命以褒之謚曰清惠仁惠于今又五十年矣郡臣前後
凡不計幾人漫不茲省某年某官等乃狀上尚書曰郡
境廟象清惠仁惠之神歲無牲牢祭品不備領祠無官
尚書秩宗伯禮有儀謹以告其日會太常議制白丞相
府符下永平曰夷齊求仁得仁廟食固宜歲春秋蠲吉
典儀有司行事俸且署矣乃重白丞相府以孟軻稱伯
夷聖之清者也孤竹其宗國也今既象設而廟食之宜
以聖清名廟丞相府僉曰允哉嗚呼大道之鬱也則民
為得而知古豈獨民為得而知古焉士蓋有一二世不
知其傳者大道之彰也則民不識金革戰鬪之暴內則
有父子夫婦相與飾於禮節外則有官師之教朋友之
交相與譁於古豈獨知己之所傳又知當時之名世者
而傳之是則永平之人遭逢國家之隆而沐浴大道之
彰也吾將見行者讓途耕者讓畔學士相讓於俎豆工
商相貸以器貨而價不貳矣推本我世祖皇帝教化之
意願不由此歟邦之人尚礪其志而施於行哉毋徒神
之而已也

顧學齋記

古之民生有世教迨成人而四民之業定矣於是
有士者出而上得之以備公卿大夫之位其所施設於治政
之具則推其身之所脩而已後世庠序俎豆禮樂詩書
先王之道一切不行民之生於時者率蔽於耳目見聞
之習駛然各驚於資之所近情之所便而安之家殊人
異而民志始苟矣上之人又無以一之嗟乎四民之業
不分器雜奇衣踰制不教之俗交拏其前士之有特立
不迂於彼者真豪傑也哉靈龍王敬從義甫士而起家
積官為禮部郎中矣廼表其讀書之室曰顧學且曰古

有云非曰能之顧學焉非敢謂乃所顧則學孔子也屬
同官馬祖常記之祖常讀職方乘按靈龍稱塞下地國
家建國全燕靈龍畿甸之服聲名文物之所被王澤之
所先非古靈龍矣矧桑州之壤孤竹之墟朝鮮之封其
民固已熙洽於聖賢之域矣漢唐之君其德不能遠故
稱之為塞以塗墁其疆理之隘爾三光五岳醫無閭北
鎮又東千里天地網緼磅礴厚博大之氣鍾於其間
區區以丈尺地量人物者小夫之智也今從義甫有士
之行而有位於朝當世教化方興特立於聖賢之鄉而
為天子之郎官有名於朝矣而朝之時曰書夕之時曰

書猶名室曰願學鄉之人日迪從義甫之誨不遷於巽
雜奇表踰制不教之俗而皆願學焉將不煩乎官師之
政而人悉為士矣若然則願學之功豈王氏所得私哉
禮部合化堂題名記

凡職事官悉有司也惟六官隸丞相府分領庶務須降
文書春官典禮古秩宗之職或謂之南省或謂之儀曹
其視五官非獨有司之事焉天子祠郊廟則贊相中書
論制度則典議朝覲會同之班簿聲名文物之品節咨
辨位之名數稽載籍之推本莫不於是詳定焉褒崇旌
異勸善成俗報德尚賢尊右儒學之義咸敷大而涵煦

之優柔而裕養之生而不殺之道存焉與夫饗膳醴齊
之薦于上餼牽牲牢之饋于下以仁睦親以德體物分
吏以上四方之職貢專官以比四方之賓興嘉谷靈獸
獻禎奏祥皆附以達彬々乎華要之地而大夫士之高
選矣天曆己巳皇帝御極之明年飭百官脩職禮部奉
命惟謹乃相告戒不敢怠於事登公堂而更相命曰傳
所謂禮樂合天地之化者豈不謂茲類耶請用合化為
禮部公堂之名記堂之始末遂署官負之名聯屬之次
於左方云令甲尚書三負侍郎二負外二負主事二
負令史十九人通事一人國字譯史二人西域譯史二

人知印二人奏差十二人官並載其姓氏序遷之由令
史以下因制以具名俾後之人有徵焉

察院題名記

審官之法既壞仕者雜出而天下始不治矣或曰緣時
貴以取進或多貲以交結變易詭詐佞媚側辟一朝居
位而臨民、烏能償其積貪乎世祖皇帝至元五年立
御史臺設監察御史振肅庶官糾劾貪邪以繩吏牘以
除民瘼當是時宋尚未納土餽饟供給羽書四馳中原
幾十百州日以飛輓為事自漢唐之主觀之當以軍府
為急而我世祖皇帝憂民方深不俾懷官毒我黎庶則

雖堯舜之明四目達四聰者豈過是哉列聖相承成法
具在天曆皇帝登極顧御史大夫帖穆尔不華若曰內外
非臺察則官以墨敗者無由而知貪何以懼茲何以發
乎汝可於臺院殿院察院刻石以題名焉嗚呼天曆皇
帝丕承世祖之謨烈詔臺臣三院題名者臣祖常才雖
謏薄不識帝王之度要非夸以示人必勸之以善而懲
之以不善也名既刻矣後來者有目為材御史者有否
者則為御史者可不慎哉臣祖常於是而知天曆皇帝
帝王之度也守院御史脫、王德新請曰石既具矣請
以尔言為察院題名記起自至元五年至、順三年監

察御史姓名咸列于左云

州判張君去思記

在唐河東薛存義拜零陵令且行柳宗元贈以言曰凡吏于土者若知其職乎民之後非以役民而已也民之食于土者出其什一傭乎吏使司平於我也今受其直忘其事者天下皆然余每讀文至斯未嘗不掩卷太息也嗟乎三代而上長民者皆學士大夫知義禮有誠心愛民自能先之勞之而無倦隱然民之役也三代而下吏寡問學無惻隱之實罷軟者不勝任強幹者依勢作威公然役民而已矣惟元統至元間吾光州判官張將

仕獨不然將仕質美性情勇於行善先是淮兩曠民荐阻飢無良者相扇就剽掠及是歲稔猶徂前非所在竊發教棍化梗公私病之將仕以逐捕為己任盜不殫為牧民者責選良騎挽強弓挾勁箭率武夫即其巢穴逮之無遺由是惡少屏迹閭里以寧或訝判州不畏強禦能得盜必超摧將仕感然曰此吾職分內事耳何敢有功且不能令民不為盜致墮憲網今得其情徒切哀矜何敢有功其不伐如此暇日適泮宮適觀費宇見庖廩無次講堂不治司馬丞相祠圯毀謂士民曰廟以祀先聖先賢堂以厚有德學校以育人材昔馬監州勸導州

民隲草萊剪荆棘經營創始三十年于茲矣我後人乃不能繼其萬一殊可愧歎即日命匠鳩材完繕因司馬丞相之祠遂立三賢堂以楚孫叔敖齊相楊惲配食焉三賢者或生或封或隱於是將仕又以道礪其州人也已廼葺司夜之鼓已乃葺邏徼之司乃葺駟郵蓋以儒道不崇人心不正縱擊鼓警姦何益於治姦知警矣然後嚴捕盜且警其未警者焉修駟驛以傳達文書焉四者所施有序以故州民德之於其去也思之不置具狀懇余門丐文記實于珉余方闔門城西取篋中敗書冊點校存家學辭且未暇至于再三請益堅義不可辭乃

曰張將仕由汴省宣使判吾光能使州民懷既去之思是可嘉也較諸受直怠事役民而已者邈乎其魚越矣後之未者考余文不誣尚踵之哉至元三年二月吉日資德大夫前江南諸道行御史臺御史中丞馬祖常記
殿中司題名記

國朝官制御史臺立殿中侍御史雖三府大臣奏事殿中先相闕白大朝會則知百官序班於庭在臺則百官有故三日各令曹屬報狀謂之曹狀云官獨簡貴平居無文書出則秉憲節為使一道故職是者必國人世臣之曹必由監察御史以次進它人不與也天曆皇帝在

位顧臺臣若曰殿中侍御史題名無刻不宜尔可令自
今以上至制官之始咸刻之於其署殿中侍御史峻南
字羅詣侍御史馬祖常言曰尔為侍御史時且以尔嘗
學古文是記尔宜為之是為記攷之掌故殿中侍御史
得凡若干人具載于後

馬石田文集卷第八

馬石田文集卷第九

序

送劉文可之官汝州序

曩余在穎汝間識泰山劉君文可時文可尉新蔡縣嘗
騎駢駒戴武冠手大鳴鏑腰長刀驍勇勁悍闔縣狗鼠
不敢竊發余方疑文可直一武士尔於文吏事盖廓如
也又七八年余策試京師每與縉紳學士論才器人即
先以泰山劉君為稱首無一人或短之余又疑斯人者
特鄉里姓字之同者也非余向之汝穎間所識者也以
是之造請之禮焉一日闔門而謂余舍人曰前新蔡尉



劉君未余起芝塔所下進諸賓位拜既應叙往時余先
大夫官淮南行事暨尊祖歌詩風流講射御田原教種
樹農業諸論著文字數真如誦五指而信之也余於是
尤賢之重諗之曰昔君尉縣河外不過如幽并豪侯等
而今也蜚聲稱文儒雖學術之力而何功之亟也劉君
曰不然丈夫子一蹴而當女子百躍我視之尚為不力
何亟也且我前年尉一縣今貳一郡子知其道乎令甲
歲造楮幣若干置工官秩視外縣令丞上凡工官歲造
楮幣患不給至大中天官氏以我是司我信其歲之入
而不勅民以自銜屬考官取乃吏我為二平石亞今將

之官子其序以表我遂序之曰昔也武而今也文昔也
縣而今也郡河南成周之墟周南汝墳之化不泯我聖
天子文教隆盛似周成王要必刑措而後制禮作樂君
官河南日當謀問文黻衣冠家擬拾周之逸書以頌
上之徵則余也又將操觚牘以俟

送牛國寶罷教光學址歸序

余嘗觀乎山之木有所獲蒙焉隱於中曾未啟也頃之
友人國保牛君告余曰我將去潁州顧子有言以贈余
應之曰趙夫子唱古學於君之邦君之行殆欲大肆其
所學而充其志耶敢以山木之說辱行李夫大山之產

群木也其當嶧負麓廣坂長谷風日所煦清淑所會是
木也必挺管條暢繁蔚充或入雲刺天百仞千尺本可
柱棟一作宇末可凡巨其或窮崖絕壑陰寒是集楸栲雜
植叢淮一作互樛是木也必盤錯擁腫離奇符一作婁一作
不克茂達不中規矩寧元氣滋液之不均即將厚地孕
育之不類耶抑亦所樹立有利否也何同是木而材不
材如是哉今君之穎川當漢魏時為名郡天下高節之
士率十五六出穎川彬如鄒魯間其流風餘韻尚未
艾也今趙夫子豈其人耶君所謂風日所煦清淑所會
者也將見上徵明堂之材於穎水之上矣余方離奇荷

婁一作以待爨事

送崔少中序

談者謂近世治賦之臣率多弄刀筆畫籌策日夜屑了
祈毫毛利害飛文舞書陽典陰撥一有豪傑魁偉之士
學古之人以仁義為說者則羣笑目譏指號狂惑斥去
恐後太師長史燕國崔君以今年春提舉山東鈇冶將
行天山馬祖常曰子好仁義說久矣持仁義說往山東
治賦是舞干羽而戰也是擊鍾磬而田也或曰不然夫
操戈以入人之室雖三尺童子亦將召徒而拒之使之
端委執綬揖讓下車而問館焉則盜跖有所不敢辭道

之於天下如是哉道之於天下如是哉遂系以詩曰
衣之華兮雖網而章道之華兮雖闇而光有美一人兮
佩玉鏘兮捨我而他其何可忘

國語類記序

結繩不施書契有作科斗鳥獸之迹籀篆隸分及今之
書雜然並傳觀乎皇帝、警而下迨晉楚列國其間貨
錢刀布昇彝敦簠誌記銘刻文字形畫之殊極六書制
作之變曾不少相襲而其聲音文義相生相成百世一
道我國家造蒙古書曰天地自然之數以成一代之書
求合乎先王之意而不泥於人宜乃列之學官置博士

弟子負教授不廢是以近世之士鼓篋而游學宮者嘗
比於孔氏之徒焉大僕經歷持廣平張大卿所著國語
類記若干卷來請曰是書實古轉注之義為多切諱此
有年矣大卿乃能綴緝本末成一家言凡國語之引物
連類假借旁通者班、具焉子盍為我序之祖常叢讀
曲臺所記及漢急就章諸篇等知世之古今文字論列
辨博纖悉畢載何則其資寡者其中窳其籍厚者其內
克則大卿之為是書後世稽古者尚有考焉

送人南歸序

下邳程君志道解易玄既成書進之闕下天子喜其勤

詔丞相府特與提舉儒學官凡儒服者咸推為榮仍悔
其已由雜道進而崇君之進以正也率應於君而因求
君之學不已遂謂玄義出老子孔子徒所不道楊雄遭
漢厄運訖諸儒間著太玄深諉於易其名義悉與易
不類宋周邵程朱四家論道理傳天下後世者往來常
以二書不並稱今程君挈四聖一賢之要歸而比之其
有以越乎人矣以余為識程君請問之余謝不能乃自
為書遺之曰夫士之博於文久矣彼百氏肆彘衍雄深
荒忽鬼恠之辭高說天人下援俚諛鉤貫旁出漁獵小
道蔚乎其相稽也燁乎其相徵也騷乎其外禠而中

窳也嘗乎其出侈而入嗇也為士者靡不擬拾其精
華而芟剔其蔓梗也辟則津焉民有趨父難病川之不
可徒涉也而曰必求枉梁而不乘桴則可乎否耶其利
害炳々明矣且復諭程君曰君將再往一作東南游東南
有勝國故都去今世尚延其遺老猶在中必有如箕子
者且為我訊之洪範之典易之典楊雄太玄果何如
也遂抗手而別

游經歷字序

游氏為河南望族河南祖常父母邦也宜知游氏為甚
憲始辨章公起家以清德素業教諸子皆恭儉守家法

傳數十年不殄而愈熾以及其孫僕年弱冠即筮仕
為監備國史參軍宣政院經歷僕曰子知吾家世吾且
有請先是翰林姚公名余曰僕矣而字則未有也願有
以字我祖常曰惟古之道冠而字於阼階禮之意以責
成人也今子官于朝有年矣庸藉乎字為也雖然子有
命所不敢辭請字曰嘉賓夫僕主人之二一作也古之
人相見而禮飲也主有僕而賓有介焉僕能修主人之
辭以致乎賓以授介亦有以復焉於是乎宣禮節
合文章觀辭命整容體油然而大順生人道成矣嗚呼
其義顧不深哉是則曰嘉賓如之何不可尚思有以實之

李氏壽桂堂詩序

燕趙古稱多彈絲趾躡慷慨歌之士風聲氣俗表裡
并代田獵騎射以為生常報死感激以為壯偉居秦之
世趙及韓魏東方諸國糜爛蹈藉人幾於無而燕獨存
其筋角未棄之富督亢之饒傳數十世而不衰豈亦名
公始封之國邑人之愛之而不肯去譬如甘棠而勿翦
勿伐者也我國家都全燕之地以恒碣為城以瀚海為
隍生聚教養十百於古萬方之珍恠貨寶瓊琳琅玕珊
瑚珠璣翡翠玳瑁象犀之品江南吳越之絲漆刻鏤荆
楚之金錫齊魯之采績織綺崑崙波斯之童奴冀之名

馬皆煨燼可喜馳人心神則得為民而居其地者天下
幾何人哉得為民而又居其地且又不為彼物俱化者
蓋真鮮矣或曰王畿之民匪華車服羨室屋則不足以
樂承平而崇理治矣矧有悅親心而婉順其好者乎詎
可亟病其奢而深詬之也折津李氏正卿有母年八十
矣以紵繡為工不廢有弟四人悉相孝友正卿甫昆季
葺屋鄰邑之中以奉其母氏翰林侍制趙君穆為書某
其一室之名曰壽桂嗚呼若斯人者亦庶幾能悅親者
也亦庶幾不為物化者也雖然非得載諸太史氏文字
之末詩賦之間則其亦孰信之哉

送李公敏之官序

天子有意乎禮樂之事則人皆慕義向化矣延祐初詔
舉進士三百人會試春官五十人或朔方于闐大食康
居諸土之士咸囊書橐筆聯裳造庭而待問於有司于
時可謂盛矣然其進之道雖則曰應詔對策皆不過文
義細碎矯誣情實求合乎有司而覲得一官於天子也
未聞其不為利祿而不干世用特立而獨行違今而趨
古孟軻所謂雖無文王猶興者也余在河南即聞于闐
人李君公敏能尊孔子之教而變其俗其學日肆以衍
浸漬乎六經汪濊乎百家蔚然而為儒者流離困苦益

自刻厲教授於青齊之間公卿大夫知其賢名薦牘
交上用是乃起家而入官焉且公敏始有志乎古道也
豈必欲公卿大夫之知哉公卿大夫之知而不可必也
又豈為利祿世資舍其所而要其所無者哉如此則
孟軻謂雖無文王猶興者吾公敏是已余今蓋知愧焉
於其行故為序以別

王夫人貞節序

集賢待制兵部郎中康里夔之外祖姑王氏故贈上護
軍琅琊郡公之女故御史中丞劉國文正公女弟陝西
行省郎中劉天瑞之夫人也

十六年而夫死又二十六年所在有司上其事於丞相
府旌其門焉嗚呼甚矣禮之可以善俗也古者婦人夫
死已稱曰未亡人則是欲後而死也今王夫人始為顯
官女與婦也則夙夜敬事脩飾工容及其夫之沒也則
䟽布被體號泣若將終身嗚呼婦人之行盡如王夫人
則俗豈有不善者乎然善俗之道視其上之禮如何尔
上之禮既已敷錫道揚表異褒美書在官府名在州里
凡所以為善俗之道者亦云至矣而縉紳學士讀古詩
周禮先王善俗之意相屬而為之詩以宣昭天子人倫
之化且使民有所歌詠而觀感焉是亦縉紳學士之懿

德也為義固不偉歟

送高富鄉學正歸滑州序

謠諑以為辭翫散以為學利於時而躓於道賤已而貴物夫豈謂儒者之要哉寡默以為廉毅以為恭茲又豈謂儒者之要哉前年魏郡高君富鄉被省檄主光州學州人之子弟從而嚮道者數十人方駢進不已且將有來游來歌之士而高君受代去學官故服孔氏之言者咸重不及其舍吾黨而他適也咸重賢其操儒者之要而無彼一者之失也作為文章書諸幕帟以張於祖道之右祖常竊聞而私慕焉於其行贈以言曰君不躓

於道不賤乎已使其在孔子之世則有顏淵閔子者為之依歸而取正焉斯能入善人之域矣不寡默以為廉不毅以為恭使其在孟軻之世則廉必不如仲子之廉恭必不如柳下惠之不恭矣若然則高君可不謂之儒者乎

送聶道元詩序

少之時隨親提携往來宦游江淮之交續古蹟文視世之進取不屑也及官浮光祖常年已二十矣旦夕侍出入更來白事嘗從聽事後竊聽吏多以名呼私甚薄之獨聶君道元先子每特稱其字焉私又疑之請曰聶君

特篚簋曾屬獨字之何先子顧祖常而教之曰規來術
立吾誨汝蓋聶君異他吏當休沐下直跡他吏皆縱酒
斗瓦市中道元服漸衣而講律義於家不出也斯可敬
矣汝無忘吾言後其名曰大彰灼淮西山南部使者並
檄聘之貢地官祿轉登臺郎奮迅騰拔出贊淮東憲府
而祖常承大宗伯之職于朝道元喜且命曰先大夫知
我之行之子豈無言乎縉紳之士咸已賦詩為贈矣子
宜為序若夫壯詩人之情性惜執手之別離則詩序之
製也同情性之所由以達乎人之親慨別離之相慕推
今日以至于當時則茲序之所起也故以是為道元送

別詩序

風憲宏綱序

世祖肇建官制興起文物屬命御史臺昭布體統振肅
綱維正儀崇化靡不緝綏迨及列聖繼明屢揚寶訓亦
靡不顯示常憲倣尔有官欽惟皇上日月中天燭見幽
隱紹述祖宗成法申命臺端嚴茲糾劾不俾瘵官貽憂
惇獨於是臺臣協恭奉職上體淵衷下宣風紀謂古象
魏有法道路有狗今國家肅清憲綱汲引言路其見諸
訓辭者光大深厚繁然有章宜編綴成書載在簡冊垂
告內外俾當察視司持平者有所徵焉既奏上制曰可

嗚呼盛哉凡我耳目之官尚知佩服之母念

卧雪齋文集序

夫人之有文猶世之有樂也樂之有高下節奏清濁音
聲及和平舒緩焦殺促短之不同曰以下其世之休咎
象其德之小大人之於文亦然不能強為也賦天地
中和之氣而又充之以聖賢之學大順至仁溱洽而化
然後英華之著見於外者無乖戾邪僻忿懣淫哇之辭
此皆理之自然者也非惟人之於文也雖物亦然華之
大豔者必不實器之過實者必不良必也稱乎求乎稱
也則舍詩書六藝之又吾不敢它求焉袁君德平之文

可謂美矣優柔而不華典則而不質可以施之宗廟告
之朝廷而今已死無及也其子杲游於國學以余嘗從
其兄伯長甫官史館而伯長甫又好余甚者也請重序
其父之文焉噫德平之文世雖無知者抑何傷乎子杲
茲行又橐而歸於越山之下一日太史占候言南方有
光氣上達于天者其必德平之文在其下也夫

周剛善文集序

六經之文尚矣先秦古文雖淳駁龐雜時戾於聖人然
亦渾噩弗雕無後世誕詭醜駁不經之辭司馬遷耕牧
河山之陽得中州布帛菽粟之常者而為史其言雄深

唐韓愈挈其精微而振發于不羈，善文亦豈易言哉！柳宗元駕其說，忿憶憲怨失於和平，淮西雅詞晉問諸篇，馳騁出入古今，天人之間，蔚乎一代之製，而學士大夫皆宗師之。宋以文名世，歐王曾三氏降而下，天下將分裂，道不得全，業文之士咸澆漓浮薄，不足以經世而載道焉。皇元隆平，宣布文化，姚燧元明善，裒然在廷，以文致位光顯，而于今傳之。周剛善彙其文數十篇，俾予觀之，質實而不瀛藻麗，而不華殫其思，以志于文而未已者也。茲將官南方，故書以為文序，而畧告之。

楊玄翁文臺序

讀楊玄翁文臺，再過得其辭之意義氣之音節，蓋隱古字之言也。延祐初，予隸于有司，是時以古文名者清何元公，復初，假予以言曰：子之備辭幾於古矣，然於質實則過之於藻麗則乏矣。予起應之曰：祖常初無志於斯世，功名之業聞古有所謂立言之士，粗顧學焉而弗舍之也。今國家以文取四方士，其進也不雜，是以致此幸先生教之，然稱以質實則祖常有未敢能茲十餘年矣。蘊而未發也，力小勢在下，信者寡而傳者或疑之間，與東平曹子貞、甫王繼學、甫中山王儀伯、甫蜀郡虞伯生、甫相下許，可用甫宣城貢仲章、甫講求其說而猶以質

實為難而不得一變斯文為歎也而今也玄翁之文隱君子之言也蔚然而克鏘然而和而怍然而有激也質實之域幾其造矣乎之於藻麗者不飾之耳君試以論同志者何如也

梁氏壽慶堂詩序

監察御史梁克中請於馬祖常曰吾世家宛丘國家平宋吾父君用甫以應募戰有功進領

戶軍居閑嘗教

克中昆季曰吾年幼氣實時詳

詳於疑誤

弓刃出廣海瘴

地與盜賊羣結艦連履轉鬪相薄毒霧之塞也如蓋惟狷狃交帝之悲如殘

鬼一作

魅諸少年皆樂搆難倖殺為

快計而吾獨被甲執盾以赴敵未嘗妄戮一人亦未嘗以所欲貴富者載諸心以殘人之子女貨賄辛勤來歸吾弟又奄先人之業以自殖而吾亦未嘗介於懷以求已私也若曹生泰平盛世慎自問學事親孝謹人言天之報予善人恒有餘慶或者其有然乎克中佩父訓學未成而仕由御史大夫掾得官承務為江東廉訪司經歷進南臺御史遷西臺御史入為監察御史累階五品請于朝封吾父曰奉訓大夫禮部郎中飛騎尉宛丘縣男母閻氏宛丘縣君今壽皆八十冊順素領虞一作危坐堂上不穀之子三人孫男六人曾孫男女又六人侍

膝旁怡愉甘旨殆知喜而忘懼也元統元年冬十一月
殿中侍御史和禮台等以聞天子初賜一作尚尊酒借所
封制即賤臣之家以寵異之夫名與祿豈必賢者待之
為榮哉雖不賢者亦待以為榮也韓詩曰曾子仕為吏
以樂得養親雖祿不過鍾釜猶忻喜也曾子可謂不
賢乎以彼其賢猶曰喜及祿養不賢者能勿喜乎克中
又將求薦紳先生作為文章以繩天子之賜而助吾喜
為母壽也干一言序吾意何如予曰子孝矣夫子孝矣
夫犬之報于子固有所不得而知者惟明天子所以望于
子者豈不曰孝子之於親也愛之以心敬之以義事之

以道仁人之於民也必體父母以子之故器子為御史
成子為孝人者政有望於子也子異時為名宰士為良
公卿為民之賢父母一是心而已明天子之望子者如
此子姑持予言為子父母壽其必亦喜無量惟賢者而
後知此意也子謂何如克中曰然即書而為之序

送雅琬叅書之官靜江詩序

奎章閣叅書雅琬字正卿取高科登朝廷以文學才諳
遇知于天子出貳郡治以宣上德而脩百姓之務亦可
謂榮矣然而有為不懌者謂正卿宜在館閣華要與取
訪獻納發謀議佐政事而自効於靜江荒遠僻隅山側

沃海之地孰失之歟余為之言曰中州大夫士吏南越者往之不樂其土其仕皆有苟且而無憂勤之心以故其政事解弛莫致其治教之意而蠻民與僞合盜廣西數郡罹其暴害天子宰相以靜江重鎮守臣未易擇任又知正卿嘗家衡鄂駐于其壤識其山川巖坎之勢市里田土風謠習尚話言之變害利詭冒愉良之形制其傾操躡躡而導其善心必有素計也他日正卿以親老乞高郵便養而天子宰相特有是命焉夫以嘗仕于朝出入禁籞為文學之臣而治其所居已安所有事之宜否皆已習熟之士專思一慮以勞其職以宣布上德而

無苟且以憂勤百姓之務余知其必能成在官之政為後來可守之法矣此正卿所當自致其治教之意而天子宰相之所以命正卿者也又孰失之歟然余聞往時廣西憲臣帥守嘗併力以勝盜勝則削骸戮孥矯虔毒民使荆湘衡鄂兵以萬數卒殫焉正卿其特將除是而已耶抑用之為小異也豈亦制而導之已素計猶不免為是也天子宰相任之之意其然耶孔子曰天下有道盜其先變乎亦嘗思於其言否耶繇鄂泝湘過衡抵靜江吏者多中州大夫士正卿為余諗其賢者曰受命為吏大者專方鎮小者一郡一州起居靡有所失飲食不

侈以妄雖越南與中州不大異也豈當以不樂而置官以不事利進裸耶倘曰余之言可豈得蠻獠之為盜哉噫亦其民之幸也已於是不憚者與館閣僚友及京師聲明之士各忻然為文章以美其行而勸其無久於外以致其去處之情而請余為之序正卿固喜任事者故次第其言以送之

送簡管勾序

中書以簡君實理管勾曲阜廟學將行請吾為送別詩序諾之二年弗即與之也及來京師告闕里孔子廟荒圯不治又請吾曰今而為之矣始簡君布衣裋然游公

卿間公卿皆禮之雖小丈夫有所挾持不禮人者簡君亦能使之忘其挾持而禮之其交於人非有鉤連濡沫之巧也非有排難解紛之俠也平易以坦夷和樂而靜專年孫久而情益真也時益躓而義愈篤也如斯而已矣雲類而觀之古之君子入道之域者尔由於是矣簡君諫曰不敢有是願先生終序之夫闕里廟不治公卿大夫士之事也子無憂其不治也彼佛老之人室廬觀闕丹雘塗飾國所以事其師者坎焉若不終日公卿大夫士咸以文名而官祭廟有不治其師之廟而自豐其屋者哉子當求如復斯者作詩以俟之

送吳養元管勾還家省親序

番禺吳生養元年弱冠補。務進理自將無世俗子弟
華美之習吾嘗愛之今年中書署為曲阜先聖林廟管
勾捧檄而喜告子祖常曰小人有親方壽而康寧今茲
被檄非敢以尺寸之進為喜。得升斗之祿遠親榮養
也祖常聞之遽然色變而嘆曰昔吾起草野戰藝於京
師得一官則皆失怙恃矣後月給俸入及間拜錫賚歲
時市鮮新物品饋食堂上則進恨罔極自罪不孝以為
不得奉一歡於膝下雖叨冒光寵適增愧赧而獲戾於
清議迄今觀大夫士之家有侍其親之在官者儻。於

心也嚮者吾年未老大時聞生若言尚易今也吾年老
大矣聞生若言得重無判于心乎子歸矣持吾言以諭
其親則生之親將悅生之孝而喜吾之言可以為歡也
同朝君子有能賦者請以此為序

山陰書元
其陳博
大六圖
...



